

Erich Bolinius

www.erichbolinius.de

Erich.Bolinus@t-online.de

Bericht über den BSV Kickers Emden - Sendung „Flutlicht“ auf Radio Ostfriesland

Donnerstag, 16.8.2012 18.05 Uhr auf 94.0 bzw. 87,7

Moin, leev Toehörers,

dat eerst Punktspöl in de Landesliga drog Kickers Emden lesd Freedag tegen de U23 van VFB Oldenbörg ut. Un Kickers hett dormit 'n heel wichtige Stapp in de Landesliga-Toekummst maakt, wiel se dat Spöl mit 2:1 wunn. Un ok dorum, weil de Emder Jungs twee Toren wunnerbaar rutspölten un ok noch de Oldenbörger Druck uthollen hebben. Man mutt aber ok seggen, dat 'n bietje Glück un ok de Toefall dorbi wassen. Unner de Streek kann man seggen, dat dat wunnen Spöl glückelk was, aber ok verdeent.

In de eerst Menüten van dat Spöl kwamm Kickers, nettso as een Week vörher in Pesem (Pewsum), neet in 't Spöl. De Oldenbörgers wassen beter. Man na 'n Settje fung Kickers sük, vör allen de Achtermannskupp strahlte nu Sekerheid ut. Un Kickers versöchte, de Oldenbörgers glik na de Ballannahm toe stören un egen Angrepen toe starten. Man dat – un dat mutt in Toekummst noch beter worden – haute neet immer hen. Wall wurren de Oldenbörgers in hör Upbau glik stört, man dann wurr in dat Spöl na vörn de Ball völ toe gau weer verloren. Man dat is toe verstahn, spölen doch bold blot heel jung Spölers in de Mannskupp van Kickers Emden. Man för dit Spöl riekte dat ut, um faaker vör dat Oldenbörger Tor toe komen. De betere Kansen harr de jung Kickersmannskupp. Twee dorvan kunn **Marco Borchers** in Toren ofsluten. Sien Tor in 16. Menüte gung 'n moi Ofspöl van **Martin Habben** vörut. Dat tweed Tor in de 31. Menüte skoot Marco Borchers na 'n wunnerbaar Solo van **Bernd Grotluschen**.

Man de U 23 van VFB Oldenbörg harr ok Kansen, so was dat je neet, aber 'n Bült minner as Kickers Emden. Un de harr mit **Rene Carstens** 'n heel seker Torwart, de ok in sien Straafruum Baas bleev. In de 2. Halvtied leet sük Kickers menneg Maal toe völ unner Druck setten un dorbi passerten ok toevöl Ofspölfehlers. Bi de Konters versünten unner annern Habben und de inwesselte **Sebastian Bloem** de Sack dicht toe maken.

Trainer Yasin Turan was mit sien Mannskupp toefree. In Vörfeld harr he al seggt, dat de Mannskupp Tied bekommen mutt, um toesamen toe warsen. Un so see ik dat ok. De meisten van de jung Spölers, de dat eerste Jahr in 'n Heerenmannskupp stahn, mutten Erfahren sammeln. Dat dat an Freedag tegen Oldenbörg of un toe noch fehlte, hett man murken. Aber ik bün seker, dat dat noch kummt. Na vörn spölt Kickers al heel goed, Martin Habben un **Carlos Santos da Luz** sünd Spölers, de Toren sketen können un ok för de Mannskupp spölen. Och, noch een paar Woorden toe Carlos Santos da Lux. Ik hoop, dat sien 40 m-Tor tegen Groningen bi dat Tor in dat 1. Programm heel faak wählt word.

Dat Oldenbörger Fans immer weer för Randaale sorgen, hebben se ok Freedagabend in Emden bewesen. Se müssen, um anskienend hör Kracht toe wiesen, een Skütt in de Oostfriesland-Stadion demoleren. Dat Emder Fans sük dorna mit de Oldenbörgers noch de een of anner Boxkampf leverten, is neet toe verstahn.

Sönndag mutt Kickers Emden na Frisia Loga. Dat word keen licht Spöl. Aber ik löv, dat Kickers mit 2:1 winnt. Pesem hett lesd Week buten ok mit 2:1 wunnen. Will Kickers neet achter Pesem in de Tabell liggen, mutt in Loga wunnen worden. Dorbi könt de Fans van Kickers Emden hör Mannskupp düchtig unnerstützen. Un na Loga is dat ja neet wiet. Dor

kann man ok notfalls noch mit Rad henfahren. Hebben wi as Kinner fröher faak maakt, wenn wi na „Unkel Heini“ na Logberem (Logabirum) fuhren, um Apen un Löwen toe sehn.

So, nu noch, as alltied, heel kört Foetballwitz.

Gesprek in `t Arbeidsamt: "Wo völe Arbeitssteden harren se in dat lesd Jahr?" „5“ – „Aha, Gelegenheitsarbeider?“ „Nee, Foetballtrainer!“

Leev Toehörers van Radio Oostfreesland,
dat was dat weer maal för disse Week,
ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt - nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.